

ԿԱՐՆՈ ՆԱՀԱՆԳԻ ՊԱՏՄՈՒԹՅՈՒՆՆԵՐ (XIX դ. երկրորդ կես)

Հ. Գ. ԶԱՏԻԿՅԱՆ

Կարնո նահանգը զբաղեցնում է պատմական Հայաստանի Բարձր Հայք նահանգի տարածքի զգալի մասը: Բարձր Հայքի մասին «Աշխարհացոյցը» հայտնում է. «Առաջին աշխարհ Բարձր Հայք... եւ բարձր ոչ միայն քան ՂՀայք, այլ զամենայն երկիր. վասն որոյ Կատար երկիր կոչեցին զնա»¹: Բարձր Հայքի, Տայքի, Փոքր Հայքի տարածքի մի մասում ձևավորվել է հայասա-ազգի ցեղային միությունը, որը խոշոր դեր է խաղացել հայ ժողովրդի կազմավորման գործում: Հայաստանի առաջին բաժանումից հետո (387 թ.), Բարձր Հայքը մտավ Հռոմեական կայսրության տիրապետության տակ: Շուտով այն վերածվեց կոմեսության, ուր հայ նախարարները պահպանեցին զգալի ինքնուրույնություն:

VII դ., կարճ ժամանակով Բարձր Հայքին տիրացան արաբները: 689 թ. Բյուզանդական կայսրությունն այն նորից հետ գրավեց: XI—XII դդ. Բարձր Հայքը ենթարկվեց սելջուկների, XIII դ.՝ Ջալալիդդինի ու մոնղոլների, XIV դ.՝ Լենկթեմուրի, XV դ.՝ աղ-կոյունլու, կարա-կոյունլու ցեղերի ասպատակություններին:

1299 թ. հիմնադրվեց Օսմանյան կայսրությունը: Հետագայում Թուրքերը գրավելով Կ. Պոլիսը, ստեղծեցին մի հսկայածավալ կայսրություն, որը մինչև 1639 թ. անզիջում պայքար էր մղում Սեֆյան Պարսկաստանի դեմ: Նույն թվականին նրանց միջև կնքվեց պայմանագիր, որով Թուրքիային անցան Արարատյան նահանգի հարավային գավառները, Տուրուբերանը, Վասպուրականի մեծ մասը՝ Վան քաղաքով, Բարձր Հայքը, Կոճաքը, Մոկքը: Արևելյան Հայաստանում կազմվեցին բեգլար-բեգություններ, իսկ Արևմտյան Հայաստանում՝ վիլայեթներ: Այնուհետև կազմվեցին էրզրումի, իսթրաբուլի, Դիարբեքի, Վանի վիլայեթները: Նրանցից ամենամեծ տարածք ունեցողը էրզրումի (Կարինի) վիլայեթն էր, որը միաժամանակ սերասկյարի՝ Թուրքիայի արևելյան զորամիավորումների գլխավոր հրամանատարի, նստավայրն էր:

Կարինի նահանգն արևելքից սահմանակից էր Երևանի, արևմուտքից՝ Փոքր Հայքի, հարավից՝ Դիարբեքի ու Վանի, հյուսիսից՝ Տրապիզոնի նահանգներին:

Բարձր Հայքն իր վարչական, տնտեսական ու մշակութային խոշոր կենտրոն Կարին քաղաքի անունով անվանվել է նաև Կարնո երկիր, Կարնո աշխարհ:

Կարինը, հայոց հինավուրց, պատմական հարուստ անցյալ ունեցող քաղաքներից է: Նրա մասին հիշատակություններ կան Ստրաբոնի, Պլինիոսի, հայկական ավանդություններում, պատմահայր Մովսես Խորենացու, Փավստոս Բուզանդի, Սեբեոսի, Ղազար Փարպեցու, Հովհաննես Դրասխանակերտցու, Ստեփաննոս Օրբելյանի, Առաքել Դավրիժեցու և այլոց երկերում:

Կարինը շրջապատված է լեռներով: Հարավում Բյուրակնյա լեռներն են, նշանավոր Գոհանամբ գագաթով: Քաղաքի հյուսիսային կողմում Խաչափայտի լեռներն են, արևելքից՝ Միրանյաց, Ուղտի պարանոց (Դեվլեթյն) լեռները: Կարինը երկզող մյուս լեռը Այծպտկունքն է, հարավային և հարավ-արևմուտյան սահմանագիծը Զիու թամբ կոչվող լեռներն են, որոնք այդ ուղղությամբ յուրահատուկ պաշտպանական գիծ են կազմում:

¹ Աշխարհացոյց Մովսեսի Խորենացու, Վենետիկ, 1881, էջ 29—30:

Կարինը շրջապատող պարիսպներն ունեին շորս դռներ՝ արևմտյան կամ Երզնկայի, արևելյան՝ Թավրիզի, հյուսիսային՝ Օլթիի, հարավ-արևմտյան՝ Խարբերդի:

Կարինի միջնաբերդն ուներ տասներկու աշտարակ: Միջնաբերդի պարիսպներից դուրս նահատակի կամուրջն է: Քաղաքի հուշարձանների զարդը ս. Սարգիս եկեղեցին էր՝ իր քանդակազարդ արտաքինով և ներքին խոյաքանդակներով: Ս. Աստվածածին եկեղեցին, որը կոչվում էր նաև Միարան ս. Աստվածածին, հանդիսացել է Բարձր Հայքի գլխավոր սրբավայրը:

Կարինի XIX դ. բնակչության թվի մասին կան հակասական տեղեկություններ: Աղբյուրներից մեկը հայտնում է, որ 1847 թ. քաղաքն ունեցել է 55 000 բնակչություն, 1853—1856 թթ.՝ 60 000, տրից 10 000-ը հայեր², 1869 թ.՝ 90 000 բնակչություն և այլն³:

Հակասական տեղեկությունների հիմնական պատճառը թուրքական պաշտոնական վիճակագրության կողմնակալությունն էր: Ուսումնասիրողներն ու ճանապարհորդներն օգտվում էին առաջին իսկ պատահած տեղեկություններից, ուստի նրանց հայտնած տվյալներն ամբողջությամբ հավաստի ընդունելը դառնում է անհնար:

Կարինում XIX դ. երկրորդ կեսին կային 3000 խանութ, քաղաքում գործում էին 1000 արհեստավորներ, միայն հայազգի 500 վաճառականներ, քաղաքի շրջակայքում կային 50—60 ջրաղացներ, որոնց մեծ մասը պատկանում էր հայերին: Գործող 40—45 ոսկերչական խանութների գերակշիռ մասը գտնվում էր հայերի ձեռքում, որոնց տնօրինության տակ էր այդ բնագավառի ողջ առևտուրը:

Կարինը նաև առևտրական խոշոր կենտրոն էր: Պարսկաստանից Սև ծով, Անդրկովկասից Կ. Պոլիս և այլ առևտրական ուղիներն անցնում էին Կարինով: Քաղաքում գործում էին մի քանի իջևանատներ, առևտրական տներ: Իջևանատներից ամենաբարեկարգը հայի պատկանող «Պողոս» անվանյալ իջևանատունն էր: Այն կուլիսաձև, եռահարկ շինություն էր⁴:

Կարինով անցնող առավել բանուկ առևտրական ուղիներից էր Տրապիզոն—Ջուղա գիծը: Քաղաքով էին անցնում նաև Ամիդ (Դիարբեքիր), Վան, Սեբաստիա (Սևաղ), Հալեպ, Դամասկոս, Կ. Պոլիս, Թիֆլիս և Երևան տանող առևտրական ճանապարհները:

Էդ. Նաումանի վկայությամբ, տարեկան Կարին էին մտնում 40 միլիոն մարկ արժողության զանազան ապրանքներ⁵: Քաղաքի առևտրական խոշոր կենտրոն լինելու փաստը նկատի ունենալով, դեռևս XVIII դ. վերջերին Կարինում հիմնվում է անգլիացի վաճառականների առևտրական տունը, որը սերտ հարաբերությունների մեջ էր ոչ միայն տեղի հայ վաճառականների, այլև, հետագայում, XIX դ. 50-ական թվականներից, Մանչեստրի հայ առևտրական ընկերության հետ: Քաղաքի ու նահանգի առևտրական գործարքներից ամենահեղինակավորը ոչխարի առևտուրն էր: «Ոչխարի վաճառականությունն այնչափ նշանավոր է, որ տարեկան հասնում է 1.200.000 տաճկական ոսկու (մոտ 20 միլիոն մարկ) և այդ գումարի մեծ մասը մնում է էրզրումի հայերի ձեռքը»⁶,—գրում է էդ. Նաումանը: Կարինի վաճառականներն արտահանում էին գլխավորապես հում նյութեր, ներմուծում էին 687.500 ֆրանկ արժողության թեթև արդյունաբերական և լայն սպառման ապրանքներ⁷:

² Հովհ. Հակոբյան, Ուղեգրություններ, հ. 2, Երևան, 1934, էջ 294:

³ Լ. Քոսյան, Բարձր Հայք, հ. 1, Վիեննա, 1925, էջ 47—48:

⁴ Էդ. Նաուման, էրզրում, Թիֆլիս, 1869, էջ 6:

⁵ Նույն տեղում, էջ 29:

⁶ Նույն տեղում, էջ 30:

⁷ Է. Գրիկյան, Պատկերազարդ բնաշխարհիկ բառարան, հ. 2, դիրք Ա, Վենետիկ, 1907, էջ 304—305:

Թուրքիայի նշանավոր ու մեծահարուստ առևտրականներից էին կարինցիներ Գրիգոր, Սարգիս, Կարապետ Պալլարյանները, Նշկյան, Ասատրյան, Ֆնտզյան, Յուսուֆյան, Տուզյան եղբայրները, Արել Կյուպենկյանը և շատերը, որոնց ձեռքին էր կենտրոնացված նահանգի առևտրի 90 %-ը: Փաստորամաճյան եղբայրները տնօրինում էին մսի առևտուրը և միս մատակարարում անգամ թուրքական բանակին:

Կարինում և նահանգում գործում էին կերպասեղենի, կաշեգործական, մետաքսի, կոշիկի, բրդյա ծածկոցների, գորգագործական արհեստանոցները: Մեծ թիվ էին կազմում դերձակները, հյուսները, որմնադիրները, փայտամշակությամբ զբաղվողները: Առավել հայտնի արհեստավորներից էին զենագործները, որոնցից նշանավոր էին Յոթ եղբայրները: Նրանց պատրաստած զենքերն իրենց որակով չէին զիջում եվրոպական արտադրությանը⁹: Կարինի զինագործների պատրաստած զենքերը ցուցադրվել են Փարիզի 1867 թ., Ֆիլադելֆիայի 1876 թ., Վիեննայի 1873 թ. ցուցահանդեսներում և արժանացել պարգևների:

Եվրոպացի ճանապարհորդները հիացմունքով էին խոսում նահանգի ձիաբուծների մասին: Զարգացած ձիաբուծությունը հնարավորություն էր տալիս զբաղվել նաև ձիավաճառությամբ: Նրանք նշում են, որ «հայ ձիավաճառք իրենց եվրոպական եղբայրակիցներին բանի մը մեջ վար չեն մնար»⁹:

Կարինը ոչ միայն ռազմական, առևտրաարհեստավորական, այլև մշակութային խոշոր կենտրոն էր: XIX դ. երկրորդ կեսից Կարինում և նահանգում սկիզբ դրվեց աշխարհիկ ուսուցմանը: 1863 թ. արևմտահայերի սահմանադրությունից հետո դպրոցների տնօրինությունն անցավ թաղական խորհուրդների և դրանց կողմից նշանակված հոգաբարձուների ձեռքը: 1860 թ. սկսած դպրոցներն աշակերտներին տալիս էին ոչ միայն կրոնական, այլև աշխարհիկ գիտելիքներ: Նշանավոր էին Սանասարյան, Արծնյան, Գավաֆյան, Մսերյան, Տ. Ագաթյան, Աղապալյան, Հովհաննիսյան յոթնամյա վարժարանները, որ տնօրինում էին 2168 աշակերտներ, պաշտոնավարում էին 98 տեսուցիչներ: Կարինի գավառում դործում էին 114 դպրոցներ, ուր տնօրինում էին 535 աշակերտներ¹⁰: Նշված վարժարաններից բացի, գործում էին ամերիկյան որբանոցի դպրոցը, ամերիկյան վարժարանը, Մայրապետաց վարժարանը և պետական վարժարանը, որոնց աշակերտները հիմնականում հայեր էին: Այդ վարժարաններում աշակերտների թիվը հասնում էր 149-ի¹¹: Կարինի հոգևոր առաջնորդ Հարություն Վեհապետյանի ջանքերով 1870 թ. բացվել է Թարգմանչաց վարժարանը¹²:

Վարժարաններից ամենահինը Արծնյան վարժարանն էր (1811—1912): Նահանգի կրթական ու մշակութային կյանքի աշխուժացմանը մեծապես նպաստել է Գրիգորիս եպիսկոպոս Զորաբարեկյանը: Նրա հայրենասիրական կոչերից հետո, նվիրատվությունների շնորհիվ, մեկը մյուսի հետևից բացվում էին նորանոր վարժարաններ: Վարժարաններում ուսուցանում էին հայերեն, թվարանություն, պատմություն, կրոն, աշխարհագրություն, իրավագիտություն, գեղագրություն, գծագրություն, երգեցողություն, մարմնամարզություն:

Կարինի կրթական օջախների շարքում իր առանձնահատուկ տեղն ունի Սանասարյան վարժարանը: Այն հիմնադրվել է 1881 թ., Մ. Սանասարյանի միջոցներով և Կ. Եզյանի եռանդուն ջանքերով: Միայն շենքի շինարարության

3 П. А. Чичачев, Великие державы и Восточный вопрос, М., 1970, с. 103.

9 Ա. Տըբըլե, Գ. Փիսոն, Ուղևորություն Ի Փարս Առեւ. Վիեննա, 1892, էջ 37:

10 Ա. Գ. ու, Վահե, Բիթլիսի և Էրզրումի վիլայեթները, Երևան, 1912, էջ 166—167:

11 Հ. Էփրիկյան, Նշվ. աշխ., էջ 320—321:

12 Հ. Քասյան, Նշվ. աշխ., էջ 244—245:

վրա ծախսվել է 15.000 օսմանյան լիրա¹³։ «Անկարելի է նկարագրել ժողովրդային երախտագիտությունը առ բարեբարն վարժարանի, բարձր մաղմի շնորհակալաց ուղերձ ներկայացնելու աղա Մկրտիչ Սանասարյանին ընդմիջա՝ երախտագիտություն առ նորին մեծապատվություն ցուցանելով»¹⁴։ Վարժարանը էր դեպքերի ականատես 2. քահ. Հակոբյանը 1885 թ. Մ. Սանասարյանը այցելում է Կարին։ Նրան ժողովուրդն ընդունում է մեծ հանդիսավորությամբ ու ակնածանքով։ 1905 թ.՝ բարեբարի մահից հետո, վարժարանի տնօրինությունն անցնում է Կ. Եղյանին։ Վարժարանը 1912 թ. տեղափոխվել է Սեբաստիա և իր գոյությունը շարունակել մինչև 1916 թ.։

Վարժարանում ուսուցումը տարվել է գերմանական, ֆրանսիական, անգլիական առաջնակարգ դպրոցների ծրագրերին համապատասխան։ 1895 թ. տվյալներով վարժարանը ունեցել է X—XVII դդ. արժեքավոր ձեռագրեր, այդ թվում 986 թ. գրված ավետարանը։ Զեռագրերի ցուցակը կազմել է Հ. Աճառյանը¹⁵։ Թուրքական կառավարությունը 1899—1900 թթ. վարժարանը ճանաչել է որպես բարձրագույն նախակրթական միջնակարգ վարժարան, որի շրջանավարտներն առանց քննության կարող էին կրթությունը շարունակել Կ. Պոլսի, Ֆրանսիայի ու Գերմանիայի համալսարաններում։

Վարժարանի մասին հիացմունքով է խոսում էդ. Նաումանը, գրելով. «Վարժարանի ղեկավարաց կազմակերպությունն ու վարչությունը զարմացրեց ինձ»¹⁶։

1851—1908 թթ. Կարինում կազմակերպվել են 17 ընկերություններ, որոնք նպատակ ունեին աշխուժացնել քաղաքի ու նահանգի կրթական, մշակութային կյանքը, օգնության հասնել չբավորներին, կարիքավորներին։ Ընկերություններից նշանավոր էին Կրթական, Թատերական, Արշարունի, Արծրյան, Ուսումնասիրաց, Հատուկ, Անձնվեր, Վարդանանց, Դպրոցասիրաց, Ընթերցասիրաց, Միսական, Ազգանվեր, Բարձր Հայոց միություն, Աղքատասիրաց, Աղքատախնամ ընկերությունները, որոնք իրենց բաժանմունքներն ունեին մեծ գյուղերում։

Կարինի և նահանգի մշակութային կյանքի նշանավոր իրադարձություններից էր Թատերական ընկերության գործունեությունը։ Թեև դեռևս 1870 թ. հիշատակություն կա քաղաքում թատերական ներկայացումների մասին, սակայն, «Մեծն Ներսես» ողբերգության բեմադրությունից հետո թատերական խմբակը դադարեցնում է իր գործունեությունը։ Կ. Պոլսի «Օրագիր» թերթը բարձր գնահատելով ներկայացումը, նշում է, որ այն «կրնա խորին տպավորություն մի գործել նորա (քաղաքի—Հ. Զ.) բարոյական կենաց վրա»¹⁷։

Թատերական կյանքը ծաղկում է ապրում 1878 թ.։ Օգտվելով այն հանգամանքից, որ քաղաքում էր գտնվում ռուսական զորքը, կազմակերպվում է «Ազգային թատերական ընկերությունը», որը նպատակ ունի «հայուն հին փառքերը կամ տառապանքները ներկայացնելով՝ ժողովուրդը եռանդի բերել, անոնց պաղած սրտերը հրահրել և վրեժխնդրության հոգին բորբոքել»¹⁸։ Ընկերությունը ստեղծում է իր վարչությունը, որի նախաձեռնությամբ էլ սկսվում և 1878 թ. օգոստոսի 9-ին ավարտվում է թատրոնի շենքի շինարարությունը։ Սկզբում բեմադրվել է Պ. Դուրյանի «Սև հողերը», ապա «Վահեի պատերազմը Ալեքսանդր Մակեդոնացու դեմ» հայրենասիրական ներկայացումը, որին ներկա են եղել նաև «10-ի չափ հայազգի զորավարք ռուս

¹³ Արարատ, 1885, փետրվար, էջ 73։

¹⁴ Նույն տեղում։

¹⁵ Ցուցակ ձեռագրաց Սանասարյան վարժարանի ի Կարին, Վիեննա, 1900, էջ Ժէ։

¹⁶ է գ. Նաուման, նշվ. աշխ., էջ 21։

¹⁷ Օրագիր, Կ. Պոլս, 1874, № 1321։

¹⁸ Հ. Նշվյալ, Առաջին կայծերը, 1930, էջ 38։

սացա¹⁹։ Այնուհետև բեմադրվել է «Վարդանանց պատերազմը» հերոսական թեմայով ներկայացումը, որից հետո ընդհարում է տեղի ունեցել հայերի և պարսիկների միջև։

1878 թ. օգոստոսի 30-ին ռուսական զորքերը քաղաքից հեռանալուց հետո, Ֆաղլը փաշան արգելում է թատրոնի գործունեությունը, այն համարելով վնասակար։ Արգելքը, սակայն, չի ընկճում թատերական ընկերությանը, և լեհերասանները պատրաստում են «Գալլ Վահան» ներկայացման բեմադրությունը։ Զգալով, որ սեփական ուժերով հնարավոր չէ թուրքական տեղական փշխանություններից թատրոնի գործունեության համար իրավունք ձեռք բերել, ընկերությունը որոշում է դիմել Կ. Պոլսի պատրիարքարանի օգնությանը։ Ներսես պատրիարքը հույս չունենալով հաջողության հարցում, խորհուրդ է տալիս չդիմել Բ. Դռանը, որովհետև ռուսներին իրենց թուրքական աղբյուրը Պոլիսն է... ուրեմն վերստին կրսեմ, տեղվոյն մեջ լուծելու եք այդպիսի խնդիրներ, նույնիսկ պիտի ըսեմ ամեն խնդիր»²⁰։ Զկարողանալով հաղթահարել թշնամական վերաբերմունքը, թատերական ընկերությունը դադարեցնում է իր գործունեությունը։ Հատկանշական է այն փաստը, որ շնայած արգելքներին, ներկայացումներին հաճախել են նաև քաղաքի թուրք բնակչության ներկայացուցիչները, ներկայացումների ժամանակ նվազել է թուրքական զինվորական նվազախումբը։ Ներկայացումները տրվել են տեղական ուժերով։ Հիմնական կորիզը կազմում էին Սանասարյան վարժարանի բարձր դասարանների աշակերտները։

Կարինի մշակութային կյանքի կարևոր երևույթներից էր նաև թերթի տպագրությունը։ Առաջին խմորատիպ թերթը «Գարուն» էր (1870-ական թվականներ)։ Այնուհետև տպագրվել է ևս մեկ խմորատիպ թերթ, որի ասունը նշած է «Սիրտ»²¹։

Հայ և եվրոպացի հեղինակները, որոնք հիշատակություններ են թողել Կարինի մասին, կամ աշխատություններ գրել, նշում են, որ քաղաքը ասիական տիպի բնակավայր էր, ծովափնային, անսալահատակ փողոցներով, որոնք մեծ մասամբ գտնվում էին անբարեկարգ վիճակում։ Այդ պատճառով էլ, սվեյացնում է Ս. Լալայանցը, «ամառը սաստիկ փոշի, իսկ ձմռանը անանյանելի ցեխ է լինում։ Տները ցած և անկանոն էին, սովորաբար մի հարկանի, իռքիկ դռներով և պատուհաններով, միայն քրիստոնյաների թաղում կային օրհարկանի տներ»²²։

Հայերը բնակվում էին քաղաքի հյուսիսային և հյուսիս-արևմտյան թաղամասերում, որոնք Կարինի բարեկարգ ու մաքուր շրջաններն էին։ Այդտեղ ին տեղավորված ինչպես վարչական շենքերը, այնպես էլ անգլիական, ֆրանսիական ու ռուսական հյուպատոսարանները։

Բարձր Հայքը ընդհանրապես, Կարին քաղաքն ու նահանգը մասնավորապես, հայտնի են խիստ կլիմայով։ Ձմռանը սառնամանիքները հասնում են 0—45 աստիճանի։ Նահանգը ձյունառատ է, երբեմն այնքան ձյուն է տեղում, որ փակում է հաղորդակցության ուղիները։ Նահանգին, հատկապես արին քաղաքին, մեծ վնասներ են պատճառել երկրաշարժերը (1809, 1843, 892, 1895 թթ.), որոնք խլել են բազմաթիվ մարդկային կյանքեր, պատճառել նյութական վնասներ²³։

XIX դ. երկրորդ կեսին Կարինի նահանգն ուներ երեք գավառ (սանջակ)՝ արինի (որն ամենամեծն էր), Երզնկայի, Բայազետի, ինը գավառակ (կազա), արինի, Բասենի, Խնուսի, Դերջանի, Կիսկիմի, Նամրվանի և այլն։

19 Ղ. Չարըզ, Հուշամատյան Բարձր Հայքի, Բեյրութ, 1957, էջ 301։

20 Հ. Նշկյան, Նշվ. աշխ., էջ 71։

21 Ղ. Չարըզ, Նշվ. աշխ., էջ 313, 278։

22 Բանբեր Հայաստանի արևիկների, 1974, № 3, էջ 56։

23 Ղ. Չարըզ, Նշվ. աշխ., էջ 47։

Հ. Կարենցին Կարինն անվանում է «նստող փաշայի կերվածք»²⁴։ Այսինքն, կուսակալը կառավարությունից աշխատավարձ չէր ստանում և պետական բարձրաստիճան պաշտոնյաներին կուսակալ նշանակվելու համար տված կաշառքը կարող էր դռնփումների ու հարստահարության ճանապարհով հետ բերվել։

Կարինի նահանգի ընդհանուր տարածքը կազմում էր 76.720 հազար քառակուսի մետր, որից 25.500 հազար քառակուսի մետրը վարելահող էր, 15.860 հազար քառակուսի մետրը՝ այգի, պարտեզ, 35.360 հազար քառակուսի մետրը՝ անտառ, արոտավայր էր²⁵։

Դարի վերջում նահանգում տարեկան հավաքվել է 33.833.000 չինիկ բերք՝ ցորեն, դարի, հաճար, կտավատ, ոսպ, ընկույզ, 626.8100 հոխա մերգեր, լոբազգի կուլտուրաներ, պտուղ, բանջարեղեն²⁶։ Մեկ այլ վկայությամբ, 1886—1890 թթ. նահանգում արտադրվել է 28.997.000 չինիկ, կամ մոտ 12 մլն փութ ցորեն, գարի²⁷։

Կարինի գավառի ամենաբերրի մասը Կարնո դաշտն է։ Այն ունի 40 կմ երկարություն, 28—30 կմ լայնություն և հարուստ էր թռչուններով։ Եվրոպացի ճանապարհորդներից մեկը գրում է, թե թռչունները այնքան շատ են եղել, որ «կարելի չէր նշմարել հողի գույնը»²⁸։

Կարինի գավառի հայկական գյուղերը եղել են բարեկարգ, կառուցված հում աղյուսից։ Պատմական հարուստ անցյալ ունեին Զիթոլն, Զիֆթլիկ, Կակուրի, Օձնի, Կրիճք, Պատիշեն, Դվնիկ, Գոմք, Երկնիստ, Խաչկավանք, Կան, Արծաթ գյուղերը։ Հինձք գյուղում էր գտնվում Կարմիր վանքը, որը կրում էր ս. Աստվածածին անունը։ Ավանդույթի համաձայն վանքը կառուցել է ս. Ներսիսը։ Վանքի դպրոցում են սովորել Գրիգոր Մագիստրոսը, Անանիա Շիրակացին, Գրիգոր Նարեկացին, Արիստակես Լաստիվերտցին։

Բասենի գավառը հյուսիսից սահմանակից էր Թորթումին, հարավից՝ Խնուսին, Ալաշկերտին։ Գավառով էր անցնում Պարսկաստան-Կարս առևտրական ճանապարհը, Արաքս գետը։ Գավառը հայտնի է հացահատիկի առատությամբ։ Նշանավոր բնակավայրերից էր Դարոյնք (Հասան-Կալա) գավառանիստ ավանը։

Խնուսի գավառը նահանգի ամենաշրառատ գավառն էր, հարուստ հացահատիկով։ Խնուս քաղաքը կառուցված է ձորակի երկու լանջերին։ Հայերը բնակվում էին Ձորի թաղում։

Դերջանի գավառն ունի կիսալեռնային կլիմա։ Նշանավոր բնակավայրերից էին Բագաուիճը, Բուլքը, Մաղկուրին։ Գավառում է գտնվում ս. Դավթի վանքը։

Գիի գավառը գտնվում էր Կարինի գավառի հարավ-արևմտյան մասում։ Հյուսիսից սահմանակից էր Դերջանի, հարավից՝ Խարբերդի, արևելքից՝ Խնուսի, արևմուտքից՝ Երզնկայի գավառներին։ Բնակչությունը հիմնականում զբաղվում էր անասնապահությամբ, արհեստներով։ Գավառի գլխավոր ուխտատեղին ս. Լույս լեռն էր, որը պաշտել են տեղի և հարևան շրջանների քրդերը։

Բաբերդի գավառը հայտնի է մրգերով, թանկարժեք մետաղահանքերով, անտառներով։ Ծորոխ դեպի Տրապիզոն առևտրական ուղին անցնում էր Բաբերդի միջով։

Սպերի գավառի նշանավոր պատմական վայրերից է Քարիձորի վանքը, որ հռչակված էր 1677 թ. գրված «Յասավուրթով»։ Հայտնի սրբավայրերից է ս. Հովհաննեսի վանքը։

²⁴ Հ. Կարենցի, Տեղեկագիր վերին Հայոց, Վաղարշապատ, 1902, էջ 26—27։

²⁵ Հ. Կարենցի, նշվ. աշխ., էջ 299։

²⁶ Նույն տեղում, էջ 303։

²⁷ Турецкий сборник, СПб., 1909, с. 144.

²⁸ Հ. Կարենցի, նշվ. աշխ., էջ 302։

Կիսկիմի գավառում է գտնվում Բարձր Հայքի և նահանգի ամենախոշոր գյուղական համայնքը՝ Խոտորչուրը: Այն ունեցել է յոթ թաղամաս՝ Խանդաձոր, Սունենց, Կազմի խոտ, Գեղուտ, Ճիճապուղ, Կիսակ, Կրման: Խոտորչուրը անվանվել է նաև փոքր Հոռոմ:

Թորթումի գավառում է գտնվում համանուն լիճը և 40 մ բարձրությու-
նից թափվող ջրվեժը:

Դիագին գավառը պատմական Մաղկոտն գավառն է: Գավառում է գտնվում բնության հզակի կառույցներից մեկը՝ բնական կամուրջը: Գավառը հայտնի է իր բուժիչ ջրերով: Դիագինից 15 վերստ հեռավորության վրա գտնվում է Բագավան վանքը: Ուլքիլիի ս. Հովհաննես վանքի տեղում, ավանդության համաձայն, Գրիգոր Լուսավորիչը մկրտել է Տրդատ III թագավորին:

Բայաղետի գավառի նշանավոր բնակավայրերից է Բայազետ քաղաքը, որը հնում հանդիսացել է Բագրատունիների տոհմական կալվածքը:

Նահանգի նշանավոր գավառներից է նաև Երզնկայի գավառը: Երզնկա քաղաքը պատմական Հայաստանի Երիզա ավանն է: Հայտնի է Անահիտ աստվածուհու հեթանոսական մեհյանով: Այնտեղ էր գտնվում աստվածուհու ոսկեծուլ արձանը, որը մ.թ.ա. I դ. Անտոնիոսը որպես ավար տարավ Հոռոմ: Երզնկան իր գոյության ողջ ընթացքում պահպանեց ազգային դեմքը, կենցաղը, սովորույթները, մշակույթը: Գավառի Թիլ ավանում էր գտնվում նաև աստվածուհու մեհյանը: Նույն ավանի կաթողիկե վանքում են թաղված Ներսես Մեծն ու Պապ թագավորը:

Կամախի գավառի հարուստ պատմական անցյալ ունեցող բնակավայրը Անի-Կոմախի բերդաքաղաքն է: Այնտեղ էր գտնվում հեթանոսական զլխավոր աստված Արամազդի մեհյանը, Արշակունիների գերեզմանոցը, որն ավերվել է չորրորդ դարում: Գավառի Թորդան ավանում էր գտնվում Բարշամ աստծո մեհյանը: Ավանը աշխուհետե դառնում է կաթողիկոսական աթոռի սեփակա-
նությունը, ուր թաղված են Գրիգոր Լուսավորչի տոհմի կաթողիկոսների շատերը:

XIX դ. երկրորդ կեսին, հատկապես 1877—1878 թթ. ռուս-թուրքական պատերազմից առաջ, ինչպես ամբողջ Արևմտյան Հայաստանը, այնպես էլ Կարինի նահանգը դարձավ հայության տնտեսական ու քաղաքական հալածանքների ասպարեզ: Մինչև դարի 90-ական թվականները քուրդ և թուրք ֆեոդալները տիրացան հայաբնակ գյուղերի հողերի մեծ մասին: Կարինի նահանգի Խնուսի, Այաշկերտի, Բայաղետի, Բասենի, Քեմախի, Երզնկայի, Դերջանի, Բաբերդի գավառների 129 և ավելի գյուղերի «հազարավոր արտեր, մարգեր, արոտներ, տներ, ջրաղացներ» բռնագրավվեցին: «Օրինակ, Երզնկա—Դերջան ավելի քան 15.000 օրավար, 250—350 շենքեր, արոտատեղեր: Բարերդ, Բասեն, Այաշկերտ և այլն 25.000 է ավելի արտեր, մարգեր, 270 է ավելի շենքեր, 7 ագարակ: Խնուսի 19 գյուղերէն 1000 է ավել արտեր, և իբր 400 շենքեր» նույնպես բռնագրավվեցին: «Ընդամենը Կարնո վիլայեթին մեջ ավելի քան 100.000 օրավար»²⁹ հողեր:

Տնտեսական ու քաղաքական հալածանքների տակ ընկած կարինահայու-
թյունը եթե սկզբում չդիմանալով ճնշմանը դիմում էր պանդխտության, ապա աթմ ասպարեզ լիցն դավանափոխությունն ու կրոնափոխությունը: Այսպես, Գ. Սրվանձտյանցն ուսումնասիրելով նահանգի Քղիի գավառը, գալիս է այն հզորակացության, որ «Քղիին մեջ քիչ միջոցի տեղությունամբ հայ անուն կա-
բող չի պիտի գտնվի, քանի որ բռնության շնորհիվ շատերը կրոնափոխու-
թյան դիմած են և պիտի դիմեն»³⁰: Օգտվելով կարինահայության ծանր վի-
ճակից, իրենց գործունեությունն աշխուժացրին հմրոպական ու ամերիկյան միսիոներները: Կաթողիկ ու բողոքական միսիոներներին, սակայն, չհաջող-
վեց ամբողջությամբ հասնել իրենց նպատակին: Կարինահայությունը մեծ

29 Հ. Շ ա հ ա ղ յ ա ն, Քուրդո-հայ պատմություն, Կ. Պոլիս, 1911, էջ 119:

30 Դիվան հայոց պատմության, դիրք ԺԳ, Թիֆլիս, 1915, էջ 173:

օանքերի գնով կարողացավ պահպանել իր հավատը: Նահանգում կաթոլիկական հավատա ընդունեցին միայն խոտորչուրը, Սպերը, Կիսկիմը:

XIX դ. երկրորդ կեսը թուրքահայտակ ժողովուրդների ազգային դիտակցության բարձրացման, ազատագրական պայքարի բորբոքման ժամանակաշրջանն էր: 1862 թ. Զեյթունի ապստամբությունը, 1863 թ. սահմանագրությունն ունեցան իրենց հեղաբեկիչ դերը՝ արևմտահայ ազատագրական գափարախոսության ձևավորման ու պայքարի զարթոնքի գործում: Սահմանագրական շարժման բաղկացուցիչ մասն էր կազմում նաև Կարինի բարենորոգումների ծրագիրը, որն իր պահանջների, առաջադրված խնդիրների ընդգրկմամբ մի քայլ առաջ էր սահմանադրությունից և այն լրացնելու նպատակով մշակված՝ գավառների բարենորոգումների ծրագրի համեմատությամբ: Կարինի բարենորոգումների ծրագիրը գրվել է 1879 թ.: Հենվում էր 1876 թ. օսմանյան սահմանադրության ու Բեռլինի կոնգրեսի որոշումների վրա: Ծրագիրը մշակվել էր Արևմտյան Հայաստանի կոմիսարին ներկայացնելու համար: Այն կազմված էր առաջաբանից, 46 հոդվածներից և վերջաբանից: Ծրագիրը հույս էր հայտնում, որ կոմիսարը գալով Հայաստան, կաշխատի իրագործել այն բոլոր միջոցառումները, որ պահանջում են տեղական կարիքները:

Բեռլինի կոնգրեսից հետո նահանգում սոցիալ-տնտեսական ու քաղաքական հարաբերություններն ավելի սրվեցին: Առաջինն իրենց խժոժությունները սկսեցին քրդերը, որոնք գործունեության ասպարեզ ընտրելով Քղին, անարգել շարունակում էին իրենց բռնությունները: «Այս գավառն ամեն օր գրեթե նոր թատերաբեմ մը կունենա, որու դերասանը Քուրտն է, տնօրենը պեյերն, և ողբերգությունը հայ երիտասարդներու վրա կը վերջանա»³¹, — կարդում ենք «Մշակում»:

Ասել, թե կարինահայությունը կորցրել էր դիմադրողականությունը, սխալ կլինի: Դեռևս դարի 60—80-ական թվականներին քաղաքում կազմակերպվեցին «Վարդանանց», «Ղևոնդյան», «Դպրաց», «Ուսումնասիրաց», «Պաշտպան հայրենյաց» ընկերություններն ու կազմակերպությունը, որոնք խոշոր դեր խաղացին ազատագրական շարժման բորբոքման ու համախմբման գործում:

1881 թ. մայիսի սկզբներին իր գործունեությունը սկսեց «Պաշտպան հայրենյաց» կազմակերպությունը, որն արևմտահայ իրականության խոշորագույն երևույթներից էր, ազատագրական պայքարի լուրջ ու կազմակերպված դրսևորումներից մեկը: Այն գնահատվում է որպես «Զեյթունի հերոսական ապստամբության նման մի իրադարձություն, որը համազգային արձագանք ստանալով, դարձավ մի մարտաշունչ այգանվազ, հուշելով արևմտահայ ժողովրդին, որ իր ազատությունը նա կարող է ձեռք բերել պայքարով, այն էլ կազմակերպված, հետևողական ու զինված պայքարով միայն»³², «Պաշտպան հայրենյացը» թեև գոյություն ունեցավ կարճ ժամանակահատվածում, բայց խոր արմատներ գցեց կարինահայության մեջ, որի վկայությունը 1895—1896 թթ. ջարդերի շրջանում նահանգի հայության կազմակերպված ինքնապաշտպանական մարտերն էին:

1890 թ. ծայրահեղ լարված իրավիճակ ստեղծվեց Կարինում: Թուրքական մոլեռանդությանը հագուրդ տալու նպատակով, իշխանությունները զենք հայտնաբերելու պատրվակով, նախաձեռնեցին Սանասարյան վարժարանի, Առաջնորդարանի և ս. Աստվածածին եկեղեցու խուզարկությունները: Թեև միջոցառումը ավարտվեց անարդյունք, սակայն թուրքական խուժանը գահացրեց իր թալանի բնազդը: Զայրացուցիչ փաստը ոտքի հանեց քաղաքի ու նահանգի բնակչությանը: Ընդհարումներին զոհ գնացին 70, վիրավորվեցին

³¹ Մշակ, 1879, № 197,

³² Բ. Հովհաննիսյան, Արևմտահայ ազգային-ազատագրական շարժումները և Կարինի «Պաշտպան հայրենյաց» կազմակերպությունը, Երևան, 1965, էջ 333,

400 հալեր³³, Կարինի դեպքերը լայն արձագանք գտան արևմտահայության մեջ: Դրանք հանդիսացան ինքնապաշտպանական ու ազատագրական պայքարի ազդակ, որի բնաբանը դարձավ «Ձայն մը հնչեց էրզրումի հայոց լեռներեն» երգը:

XIX դ. երկրորդ կեսին կարինահայությունը ևս ապրեց արևմտահայությունը բաժին հասած ամենածանր ու արյունոտ ժամանակաշրջանը: Կազմակերպված ջարդերն ամայացրին նահանգի շեն ու բարեկարգ բնակավայրերը, պաճառեցին մարդկային մեծաթիվ զոհեր, կարինահայությունը բռնեց գաղթի ճանապարհը: «Այդ վայրերի մոտով գալիս ու անցնում եք առանց հայի երես տեսնելու: Անցնում եք այդ ամայի գավառներով, տեսնում հին-հին հիշատակներ և ձեզ թվում է, որ մի հնձող ձեռք անվերջ հնձում է այդ աշխարհը»³⁴, — ցավով գրում էր Ա. Դոն, նկարագրելով նահանգի խնուսի գավառի վիճակը:

Խուրք բռնատիրության հայահալած քաղաքականությունը, հվրոպական տերությունների ու Ռուսաստանի թողտվությունը, լուռ համաձայնությունն ավելի էր գոտեպնդում կարմիր սուլթանին, որովհետև նա իրականացնում էր նաև հայ ժողովրդի «բարեկամների»՝ Հայաստանն առանց հայերի քաղաքականությունը, որի դեմ, դժբախտաբար, հայ ազատագրական պայքարը կարողացավ կռվաններ ստեղծել, և կոտորածների ընդարձակ դաշտի վերածված Հայաստանի փրկությանը չհասցրեցին զինվորագրվել արևմտահայության սովոր զանգվածները:

ИЗ ИСТОРИИ КАРИНСКОЙ ОБЛАСТИ

(вторая половина XIX в.)

О. Г. ЗАТИКЯН

Резюме

Область Карни занимает значительную часть территории Высокой Армении. Вопросы истории города Карина и области, административного деления области, этнического состава населения, торговли, ремесел, вопросы культурной жизни представляют большой интерес.

В области наиболее известными историческими поселениями были города Карини (Эрзрум), Баязет, Алашкерт (Вагаршакерт), Ериза (Ерэнка), а также населенные пункты Тил, Тордан, город-крепость Ани-Комах и др.

³³ Ղ. Չարբազ, նշվ. աշխ., էջ 414:

³⁴ Ա. Դոն, նշվ. աշխ., էջ 145: